

林初文詩文全集

林初文詩文全集

明福清林章

男

君遷  
古度編次

祭文

祭尤子輝年兄文

嗚呼維羅之岡有鳥鳳皇毛采燁燁示我文章  
維羅之干有草荃蘭芬香習習漸我裳冠  
維羅之達有士子輝天寔生之荃臭鳳威鳳

今而夷我喪其儀荃兮而潰我遺其佩子輝  
而死我亡其與蒼蒼者天旣昭且平豈不愛  
世胡奪我賢其賢維何維孝維友資以事君  
民歸於厚俶守信陽六載皇皇 天子簡之  
廼拜戶郎秉道不阿讒言斯多 天子鑒之  
用遷於和謂敢怨望扶疾以往臨臥而理公  
無鞅掌勤止未期四野熙熙和人戴之如信  
陽時所謂伊人齊廣之臣溘焉而逝寔棄我

民旅櫬搖搖行李蕭蕭民將祠之魂其可招  
嗚呼憲介而貧回仁而夭死而不柘生者斯  
眇所嗟振振弗享於身有子在抱憂及厥親  
旣稼旣穡云胡弗獲天道或乖民其安適吳  
山嗟嗟淮水有波我思伊人傷如之何維羅  
之京爰有佳城魂兮歸來以居以寧維羅之  
周爰有首丘魂兮歸來以游以休采采江離  
薦此清卮魂其假思毋使我悲

祭某太母文

騷昔臨淮兮鬯搖搖有人在塹兮行佻佻蹇  
芙蓉兮求草荔思君王兮懷離愁伊采蘋兮  
何婉孌旣滋蘭兮又樹蕙薦馨香兮侯之宮  
芳菲菲兮升於帝奠厥李之觴兮申彼矛之  
盟引若飈之茂兮揚此蓀之榮昔十治之佐  
武兮孰當其內千輿安得而饗公兮上焉有  
人在故知兩宮之齊建兮敦有力於

皇天皇皇豈其不愛世兮憇不能假母以百年  
天旻旻兮霜皓皓顛不仁兮隕芳草薰榮榮  
而旣萎兮艾焚焚余憂其不好青陽之燁燁  
兮迄於白藏南斗之晳晳兮失其北庭感公  
子兮意不極念太母兮長太息泝淮水兮望  
淮山沾余襟兮獨潛潛靈之游兮于玉阜從  
夫君兮朝阿母來恍忽兮去旁皇乘白雲兮  
披紫綬公帝將命之兮輔軒轅司傳保兮宜

子孫千萬年今天上下儻來格之兮迎魚軒

祭某公文

烏乎維壇之上有烏鸛鸛厥采燁燁示我文章  
維壇之下有草蘭蘭厥芬習習漸我裳冠  
維壇之中有士于公厥狀郁郁表我流風烏  
之徂矣我心紆矣我公之歸胡不吁矣草之  
標矣我心峭矣我公之歸胡不弔矣烏乎公  
也蚤爲國賓如鶚之舉晚爲逸民如鴻之處

既無夢覺蝶化以飛乃無生滅蟬脫而歸維  
天之道一卷一舒維公推之是以宛宛維人  
之數一盈一虛維公秤之是以便便公之子  
桂林之美公也不死公之孫桐枝之祥公也  
不亡公之名竹簡之久公也不朽烏乎壇山  
巍巍公所消搖壇水泱泱公所相羊山兮可  
仰水兮可邈不見我心我心如斃我酒匪旨  
我羞匪馨於以薦之于公之庭烏乎哀哉尚



饗

祭臨淮侯太母文

我思阿衡嗟有桑只靡鞠靡畜曷佐商只我  
思甫申亶周良只孰顧孰復曰降生只我觀  
於揚鬱蔥蔥只寔啓人豪爲我明只我觀太  
母何英英只寔贊厥侯俾我王只厥封於  
淮水湯湯只世有聖善齊流光只旣隕厥道  
嗟乎傷只疇樹之德勃焉興只思我太母姪

以恭只惠於宗服浴芬芳只蓀也無怒鬯乃  
康只蕙豈不茂繁則豐只宜願宜期介無彊  
只宜爾子孫有令名只 帝曰夫人旣明章  
只朕用錫之覺乃功只長擿翹翹華綬璿只  
垂髮髦髦令儀充只哀哀旻天胡亦爽只不  
憖遺嫗式我民只惟月之厲懍降霜只我旅  
旣彌布於塲只南門搖搖東陵傾只我觀於  
辰慘不祥只顧我將軍篤貞忠只念此多難

憂旁皇只生死之鄉蹇茫茫只皇天后土施  
無窮只嗟我太母悵登堂只生芻一束涕浪  
浪只

祭某夫人文代

天耶人耶其玄輪耶誰其徵之太夫人耶曷  
將徵天引祉修年曷將徵人式穀尚賢伯也  
地輔仲也岳主獨義方哉訓慈俶苦伯也擎  
觴仲也瞻雲孝聯榮譽遐邇心勤燁彼寵封

錫崇懿懋介此大年簡申保佑王覲勞仲閭  
母來豫佐伯以舞樂且有孺從其斑衣紫綬  
若何嘖嘖純嘏順期則那嗚呼盈虛數也母  
若先知謂仲宦遠泣而教之竟戀伯養以待  
今茲嗚呼伯仲有母霄漢其翔母有伯仲泉  
壤以光仲雖離膝伯能承顏伯幸受囑仲胡  
永歎天兮昇母人修寔瑜人兮企母天藉爲  
符某辱伯下曹仰仲丰采遡德興思瞻母如

在奉蒞登堂云何而傷母也不快伯仲哀長

祭某太母文

齡也爾其長謝塵世反彼靈神使二公不得  
竟斑衣之樂而累紫誥之榮者豈人世之有  
期莫違造物之張主抑鄉邦之無類不能留  
此賢母之儀刑也二公之哀其孝子無窮之  
念乎某則謂福如是壽如有子如是亦可  
以對君子於九京而無可憾之情也雖然死

生一訣音容永隔公爲母而魂傷某爲公而  
心惻朔風寒日慘然公之堂也素詞清酌涼  
然予之將也嫠女熒熒靈所托也雲仍奕奕  
靈之所以不亡也

一 祭李太孺人文

嗟嗟太母何修獨榮生有純祉沒有懿聲自  
吳歸李惠於君子撫有三兒勞而教止謂伯  
及季用能保世謂仲其尤俾之宦游逡巡晚

歲君子見背謂伴能官運以承懽初典藩禁  
徃狂以懔再登郡幕克蒲不作兩仕十載一  
志無怠臣之分也親之訓也寧獨義方慈誨  
孔章 帝嘉其績三晉其秩命贊一邦豈不  
奕奕仲也克孝念母且耄奉歸不遑匪祿是  
保天胡不憖遺此母懷中道奪之令人驚悲  
嗟嗟太母維坤之貞生於國族卒於 帝京  
天象反魂地靈護魄千百斯年儀刑不忒令

子撫棺賢孫羅酹神如有知其又何悔所傷  
道隔見母無期吾儕知仲是感痛思鍾山之  
陽仙靈之房神其遊之無悲故鄉長江之水  
玄酒之旨神其歆之庶慰仰止

祭某元帥太母文

歲旣玄月哉霸女將崩揚之夕昊天不弔兮  
國步艱聖善云亡兮陰道厄嗟夫公族之女  
侯門之婦被副珈兮羅鼎釜旣多男兮亦多



壽羌有人兮疇若母起夫子之幽評贊天王  
之顯盟還先公之故履開嗣侯之新程享孫  
子之藻譽介耄耄之榮生揚七命之華綖樹  
三從之素旌德與紫圭光名隨綠蕙芳於晉  
爲冀賓在魯爲敬姜某等奉公子之後車伏  
我帥之前籌懷明慈而未已感殷憂其何如  
瞻梓桑兮在庭撫霰雪兮沾纓顧豺狼兮滿  
野承苫塊兮秣馬嗟嗟夫參伐指忠臣起哭

泣垂孝子悲天乎熙熙母也是爲何去何來  
願下于靈氛而命之

祭某姬文

嗚呼翳之旖旎兮豈彩鳳之所化也  
睠衆鳥而誰儀兮惟其言之是諦也  
翩雲車之逍遙兮獨餐乎松與桂也  
鬱霞衣之醺醺兮豈待乎紉蘭而纓蕙也  
嫋嫋乎掩此迷香兮若藏花而閉月也  
馬羈羈乎紛其結駟兮疇不願射

麋而納之麗也嗟一笑其千金兮顧儂心之  
終不惠也驕五馬以如龍兮剛不回其曾波  
之一睇也旣其悅長卿於此堂兮猶羞乎豔  
女之求婿也是以挾仙史於彼臺兮按參差  
而離離乎相齊也感懽之與儂同心兮願纏  
綿而永締也懽不幸而丁坎壈兮儂豈改乎  
初態也居西閣之窈窕兮執璫璫之婉媚也  
笑使君之不諒羅粦兮徙旁皇乎南陌而僻

倪也憐此形影之聯娟款款兮十二年之愛  
也忽一朝而去萬里悽悽兮胡不感白頭而  
掩涕也豈曰爲雨而爲雲兮暮暮朝朝不可  
悔也惟此愁水而愁風兮歲歲年年蹇儻情  
於夢寐也思糾結其中縈兮夫是以魂爲懽  
而遠離也行崎嶇以旁迷兮終然委儂魄而  
長逝也命之不长兮無望乎緣之繼也分之  
當絕兮敢怨乎恩之替也痛惟懽之多情兮

儂不其初意也今何去而不來兮羌不得與  
能忘訣也嗚呼余知美人爲神人之流兮胡  
之一降此世也擾擾乎其生死之不可知兮  
爲乎走而請於帝也旣隕其秋葉之飄飄兮  
余將以春華之棣棣也旣溘其朝露之湛湛  
胡飾皎以霄星之唼唼也余固美鴛鴦之文  
兮胡彼芙蓉之並蒂也豈謂傷蜉蝣之短兮  
兮春彼琉璃之獨脆也追疇昔之良因兮感

又恨終初之篤契也慕婉孌之姱修兮耻齷齪之不可說也嗚呼彼幽昌之來鳴兮何足足而迢遞也舍此都而去之兮將歸於風穴而獨稅也吸砥柱之玄波兮濯於弱水而剗其翳也裊長鳴而提扶兮曾不悲焦冥之無類也嗚呼美人兮而在三層之院兮余能令昆侖挾而昇也而在六宮之門兮余能使押衙毒而載也而一飛其九天兮獬獬兮窮寥

廓而難繫也余是以叩帝闕而長號兮喑喑  
乎哀余音之殆啜也魂何之而可招兮余將  
請靈氛而下筮也懷懃懃而薦芳兮願美人  
之哀王孫而降衛也

祭劉胤芝文

有美一人天帝之臣雲冠霧服光照列嬪帝  
命司案作宮於漢長夜漫漫明星有爛睠彼  
帝女歸於牛渚靜言思之涕零潸潸恭請於

帝願生下世如伊人今求其伉儷維帝訶之  
錫以修眉謫居北里爰作都知十年候候爲  
花月主韓娥避歌趙妃讓舞豈不華妙奈此  
年少顧瞻大堤憂心如恍言念瓊瓊適於書  
生暨彼汧國並有令名那則不淑羞此孀孀  
生爲誰容死將誰哭七郎脩脩來自雲霄坐  
我瑤臺吹我玉簫有鳥五色聽之來革雙雙  
乘之止于其國願言相將效此鸞皇倡予和



女如彼官商載儀之髦載結之悅胡爲乎哉  
湔然而逝嗟嗟美人曷不如花春而燁燁秋  
落其華嗟嗟美人曷不如月暮而娟娟旦失  
其闕雖有天年何其感也雖有帝令何其速  
也檟木如蘭蜃炭如丹斑斑七寸美人之棺  
青山有雲碧草有芬纍纍三尺美人之墳彼  
有人矣海棠溪灣彼有人矣燕子樓間我思  
二姒百年一死不如美人得其所矣邛山嵯

嗟貴骨滿坡黃金不贖紅顏奈何夜臺杳杳  
曉日無期壯志不起佳人已而言樹之桃無  
長蓬蒿東風時至美人心勞言樹之楊無下  
牛羊西風將起美人心傷石飛維燕草化維  
螢美人千載豈不爲星投盒維寃葬骨維恩  
美人再世豈不爲鶯翩翩翔矣於帝鄉矣雲  
今雨今渺洋洋矣吁嗟乎東流不回美人不  
來夕陽在地酹女一杯

哀文

用叶七虞古韻

嗚乎嗚乎嗟彼昆流有草維素旣連旣偶亦  
加亦遐春風不媚秋水自姤亭亭如媛不知  
何萃誰其謂之其愛之乎誰其愛之其似之  
乎思昔區區兩小相侔睽此芙蓉願托蒹葭  
王睢爲理鴛鴦思爲媒旣告以好胡繼之淪嗚  
乎嗚乎痛余迤邐未壯而孤羗此骯髒不豪  
而麤無爲此蠹寧如彼犢惟是孤矢是余之

初攝提貞陽歲月其休旣叶鳳皇廼歌驪駒  
看我寶刀擊彼玉壺別我猿霍從於江湖青  
山祖道黃葉歸途三冬二春九客一家自未  
之臯歷亥之涂五經新火一見故榆揮金旣  
慷敢惜投珠彈鋏不快終慚棄繻舌存誰說  
腰瘦自持卿乎知我且笑且吁三致寧巧一  
散寧愚惟是千金是郎之籌破甑何顧失馬  
何慮惟是采薪是妾之虞嘗藥非苦憂心如

茶對食無甘勞骨成枯悠悠霜夜冉冉花朝  
舒眉幾有斷腸欲無馬卿猶渴荀妻已憐可  
憐伏枕不忘當壚攬鏡自慵斷機惟劬掠彼  
蓬鬢結我蒙鬢願郎卷土破越入吳笳鼓歸  
來奏馘獻俘君姑無恙少婦無誅妾雖地下  
爲郎援袍郎如駛騁莫忘崎嶇妾似蜉蝣何  
勞踟躕茨菰旣瀾至濤送夫鴻雁欲來北風  
吹奴行矣行矣歸乎歸乎幸留蕉萃以待須

史嗚乎嗚乎感卿此意三踊三譁痛余不利  
再戰再輸勾踐棲越李陵走胡徒立四壁長  
守一株日月易邁山川難逾玉釵頻斷金錢  
不符使君何來翻悲羅虜將軍不還空寄錦  
圖新愁載織舊恨若鏤片魂旣離半魄欲浮  
旣無荔草又無護華焉用菰實與彼雲腴嗚  
乎嗚乎去年何年困敦不舒十月旣肅百草  
就消恨彼青女奪我素秣傷此芙蓉委之花

荷破我桐心我音嗚嗚吹我蘭膏我淚淒淒  
別崔離鸞風急自歌茂牛望女河曠無舟平  
仲不送子規自呼不替干主豈學封侯愁腸  
自轉本無轆轤離懷不斷空有昆吾嗚乎嗚  
乎婉孌余恩胡則不淑稚顏雅則惠于二姑  
叔伯無怨娣姒以愉何論諸少視此羣僕一  
十一載傷哉瞿瞿爰舉我案准余之嘯嗚乎  
嗚乎痛余浪蕩蚤歲馳驅扁舟冬夜疋馬春

徂今日吳門明日燕都朝在辟離暮在章臺  
千金買笑五花問沽歌悲劇孟舞快都盧敢  
誇餉客頻結酒徒旣迷燕子乃覺揚州青樓  
薄倖白面驕奢離多會少君樂妾憂道傍茅  
茨山上薜蘿西堂蟋蟀東風鷓鴣夕陽珠箔  
明月綺疏瑤琴流水玉簫彩霞花開花落燕  
來燕去何時何處不令人思嗚乎嗚乎而愁  
何辛余遺之萸而病何痛余割之鵠余笙兩



調而不廢竿余矢九反而不怨弧而姑念子  
而悔烹伏而母背女而悲啼烏而計半載余  
秣無芻而魂萬里余招無服而生有夫曾不  
爲鳬而死無子豈其化蒲而德之芙蓉華始  
跼余情之短藕絲不如而命之薄荷葉以枯  
余懷之苦蓮心豈殊嗚乎嗚乎月去不辭雨  
紅樓花別不歸苔上絳厨簾垂屈卹帳掩  
江蘇夢沉琥珀影碎珊瑚嗚乎嗚乎我藕旣

剗我茄誰扶生不見蓮死何惹乎鰲之渠渠  
芳草綠洲敢忘同穴願作並頭

林初文詩文全集

明福清林章著

男君遷古度編次

雜著

太史奏五色雲映殿庭對

宋韓魏公登第時五色雲光映殿庭說者謂其有大造於宗社故天象之徵其休者如此然則人才之生其係於天而雲之爲物亦有

足瑞者乎曰世道之休否由天道之晦明天  
將開一代之景運必生之人才以光贊其統  
而人才茂昭之兆或見於象數之間日月星  
辰雲霓雨露山川草木飛走潛鳴之彙率有  
足徵者是故升堂見黃啓重華之聖帝入房  
生白肇執中之明王起於沈璧而堯興浮於  
觀河而成顯彰漢祖之封山則宮闕構象感  
魏文之毓秀則車蓋停空降王輔之精卜賢

人之隱雲之爲瑞昭昭也而況五色之祥又  
世所希見者乃魏公之相宋也文致太平武  
戡禍亂謀安宗社而不自以爲功急賢才輕  
爵祿而士不知其德四夷八蠻想望其丰采  
而天下以其身爲安危者數十年碩德宏勳  
固有與雲漢相爲昭回者方登第之始正風  
雲際會之期唱名未終而天卽以五色雲應  
之流輝銀漢之間散采楓宸之上驚史臣之

馳奏聳朝野之奇觀於戲公之生信非偶然  
矣抑上天之意寧爲公而已耶吾嘗因是  
而深有感於宋室人才之盛矣蓋自五閭雕  
陋人物骯髒岩穴草茅韜光斂耀此固陰雲  
翳霾天日晦冥之候也迨宋祖龍興廓清天  
宇攬星散之英雄收霧藏之豪傑四方之士  
已駸駸然雲蒸而雨至矣故乾德之中五星  
聚奎占者以爲文明之象嗣是而有三館之

開六科之設與桃李以春風鼓鷗鵬以洪浪  
英才茂行川湧霧滃歷宋之世蓋彬彬然焜  
燿後先也故有坐論朝堂之上扶日月作霖  
雨而措天下於泰山者有旋乾轉坤補天浴  
日而奠國家於風雨漂搖之際者有排瑣闥  
以觸雷霆獨特風裁而凜然秋霜之在望者  
有承流星郡分霈花封馳清水之妙譽而澤  
滿於棠陰者有倚劒於崆峒掛弓於扶桑蒙

犯霜霰而掃沙磧之妖氛者有吟弄乎光風  
霽月徘徊乎天光雲影淵源洙泗而揭斯道  
於大明之中天者有摛詞於風雲月露之篇  
掇天葩濯霞錦而翰苑以之流芳者有栖神  
雲壑寄傲烟霞亭亭于霄壤之表而震百代  
之清風者有氣節凌霜精神貫日而挺然于  
隆冬大雪之後疾風板蕩之秋者此其道德  
勲業節義文章熒煌天地照耀古今秀會乎



陰陽靈鍾乎嶽瀆光分乎景星慶雲之氣瑞  
擬乎祥麟苞鳳之珍猗與休哉燁然一代之  
人文誠望之如雲而更僕未易數也天命在  
宋有開必先五色雲之見意者有徵於此乎  
故君子觀乾德之治覩太平之政則知國初  
諸公如山川之出雲吐華騰彩滄滄乎而不  
可闕也讀唐介之頌詠秦襄之詩則知慶曆  
諸賢如雲漢之爲章于天寰宇搖光烺烺乎

而不可壅也閱古靈之薦稿誦文德之黨碑  
則知元祐諸士如雲物之班布太虛千態萬  
狀鬱鬱乎而不可窮也至於中興末葉諸君  
子則若歲寒翔雲雖非太和之景色然亦依  
依乎翌日以飛未嘗隨風而披靡也其間之  
浮雲竊發濁靄相蒙則陰陽剝復之理天日  
昏蝕之常自古所不免者庸傷爲多賢之世  
耶故曰前三代夏商周也而闇之人才則獨

盛後三代漢唐宋也而宋之人才則獨隆若  
子觀祥雲之見雖未嘗不歎魏公之非偶而  
猶知天之光啓宋治者爲不小也獨魏公之  
故云乎哉嗟乎簫韶作春秋成而鳳麟至星  
聚奎雲五色而賢才昌或先時而洩其機或  
後時而顯其應此理之常無足怪者然而君  
子猶有說焉夫人才猶雲也人君其猶龍乎  
易曰雲從龍龍不得雲固無以神其靈雲而

非龍則亦弗從矣世有乘龍御天之君則賢  
哲彙征輝聯朝宁雲行雨施而天下平否則  
亢龍有悔士將歸江湖藏岩谷畱白雲於青  
山而天下不復覩休明之治故宋之人才非  
不盛也熙寧正和之間擯斥不用祥雲之光  
散亂於海隅嶺表卒使宋室乾坤爲夷氛之  
所混塞焉是知人才之生雖自天而用之則  
存乎君耳君人者建正中之龍德以吹噓天

下之雲俾從龍而起者濟濟然皆魏公之儔  
則世道實嘉賴之幸毋曰係諸天而徒望雲  
之五色哉

擬策寧夏并關白事宜對

握理亂之機者通於時者也決勝負之算者  
因於勢者也何也國家之理亂有時時之所  
難雖壯士無勇而智者失謀是故善撥亂者  
貴通也兵家之勝負有勢勢之所易雖匹夫

逞志而遠人生心是故善制勝者貴因也請  
以是籌今日之事今天下承平幾二百三十  
年鄧隆極盛茂以加矣頃者災異屢見變故  
相仍哮劉連套虜關白據朝鮮議將調兵殆  
經歲月喪師隕帥且至再三嗟夫病水病旱  
病疫呻吟未已歾盜歾虜歾倭瘡痍復起此  
生所謂時也尚可泄泄焉執拘攣之見而不  
馳超曠之議哉夫下不逼上而哮劉則戕我

重臣矣無重臣是無君也無君者殺無赦矣  
不亂華而關白則滅我賓國矣無賓國是無  
王也無王者誅無禁是故招安之乞非啍劉  
意也卽是亦必不可許何也要君之萌不可  
啓也朝貢之請非關白意也卽是亦必不可  
許何也猾夏之階不可長也竊以爲啍劉之  
勢在虜討啍劉莫若因而先伐虜關白之勢  
在朝鮮討關白莫若因而先伐之於朝鮮何

也邊餉減而軍怨深市賞濫而虜驕甚故哮  
劉之變虜且以爲奇貨而軍且以爲義舉矣  
夫劉軍輩也哮虜種也以虜制虜以軍敵軍  
事可知已且寧夏一鎮有二險之恃有三年  
之積賊之黨皆有死心環城而攻之則師老  
可虞決河而灌之則刑淫可痛何不大簡四  
方之銳先伐虜而使之自危乎此所謂飛焉  
而剪其翼也不然豈無以平哮劉且無以創



虜華夷交亂九邊將折骸矣胡騎擾而遼陽  
虛夷馬獻而朝鮮弱故關白之來朝鮮若其  
故土而遼陽若其平地矣夫遼陽我內屏也  
朝鮮我外藩也撤我之藩窺我之屏意可知  
已且日本六十六國有百萬之衆有十年之  
備寇之入必無歸志乘虛而擣之則航海可  
危分軍而逆之則血刃可傷何不大張六師  
之威先伐之於朝鮮而使之不渡乎此所謂

寢焉而溢其吭也不然豈無以却關白且無  
以撫朝鮮恩威兩失四夷將解體矣夫國有  
亂民亦有治士兵有敗道亦有勝數是故有  
裴相則元濟可擒也有郭公則祿山可破也  
呼劉之智豈過二賊吾亦豈無裴郭之方畧  
哉師所爲無成者勢所牽也有終童則南越  
可繫也有班生則西域可定也關白之強豈  
過二敵吾亦豈無終班之才具哉寇所爲難

逞者勢所乘也是故怵於其變不先爲伐虜  
伐倭者非因勢之謀也狃於其故不大爲議  
財議兵者非通時之識也何也兵以待賊賊  
且及國何爲省兵財以養兵兵不及賊何爲  
惜財今能置二豎於腹中付一敵於度外乎  
不能則衛卒何不可訓也餘丁何不可抽也  
又不能勦鄉氓何不可率也市兒何不可驅  
也又不能則鹽鑛之徒亦可募矣如是而豈

患無兵今能止三軍之待哺免千里之餽糧  
乎不能則積儲有其輸之也羨余有其括之  
也又不能則宮苑有其出之也商賈有其入  
之也又不能則金銀之鑛亦可發矣如是而  
豈患無財有財有兵可以將矣然後推轂於  
武科授鉞於勛冑特選於詩書博搜於草澤  
無已則拔之行伍起之罪囚無徇愛無豔名  
無匿奸無啓貨如是而將有不良者否也將

良兵強何國不昌兵足食富何敵不什嗟夫  
天下之民天下之兵而議者動患弱一代之  
財一代之用而議者動患寡文武滿朝誰非  
將也而議者動患乏然則長慮却顧者蓋臣  
之意也從權應變者謀士之圖也由彼十六  
事行之豈復有此三患哉若夫謹斥堠繕溝  
壘飭器械編行隊此邊吏之事非所以勤  
廟堂之慮也謹對

## 海防議

辱明問罷羊山之遊兵復楊舍之守備二者  
救時之議也某旣待罪軍旅敢無所對鄉者  
倭奴越海數千里寇我內地十餘年徃徃倏  
忽莫知所備者則我耳目之不長故也今舉  
百萬生靈之耳目而寄之二千之遊兵重矣  
議者何欲罷之此其說有三形勢之難據也  
風濤之難犯也士卒之難任也夫海島勢誠

曠絕然羊山諸山槩浙直之咽喉寇之來也  
取薪水必道諸山吾八寨皆兵遙相望令  
苟無疎豈虞不覺謂形勢之難據者否也夫  
風濤無常寔天時爲之寇雖兇桀豈能違天  
故風順則我亦順風逆則寇亦逆且海氓率  
知風汛艤舟自有常所覆沒之禍累年不一  
見謂風濤之難犯者否也夫山居者善攀水  
居者善游其習然也卽驅燕代之民而頻年

試之行水亦宜其操舟如弄馬者况土著哉  
謂士卒之難任者否也故兵之所慮慮在簡  
之不精令之不嚴而三說者非所慮已若虛  
冒之衆稽覈之難則惟將領者一注意耳何  
足煩計議哉大底用兵得戰守之形者勝明  
虛實之法者勝今使諸哨厚列而按戈遊兵  
據害以傳檄內者匿軍容外者張威聲此得  
守之形者法所謂虛也寇至則遊兵扼其喉



諸哨騎其角去則諸哨躡其尾遊兵出其要  
此得戰之形者法所謂實也實故能拒之使  
去虛故能恐之使不來與其拒之而勞孰若  
恐之不來之爲逸故遊兵不可以罷已主議  
者謂罷此歲可省萬金嘻此誠節財之論哉  
然使遊兵而不足恃則可苟可恃則一年無  
患一年之利也百年無患百年之利也何論  
萬金必欲罷之有如防禦一疎寇得內掠無

論民財喪亡卽一歲師費豈止萬金况夫財  
在民猶在官也仡仡勇夫孰非赤子彼其冒  
險阻茸鋒鏑惟歲月鎔銖之求而有利於地  
方也吾何爲靳之故謂遊兵之無用而罷之  
則可罷之以其費財故則不可蓋二十年來  
與二十年前之明效可槩睹已雖然倭人去  
我遠甚其於人疥瘍之疾耳若常鎮之間私  
鹽之徒往往以數百人橫行道路至於拒公

差殺官兵觸嚴刑而不忌則嘯聚之亂可憂  
也是腹心之疾也苟可以重權壓之則何惜  
不復一守備官乎况衛舍有常所廩祿有定  
輸有其舉之可矣第恐所以壓之者猶有出  
於重權之外也是不可不講也夫憂及倭奴  
則遊兵不可罷憂及鹽徒則守備爲當復昔  
人有言兵者百歲不一用然而不可一日忘  
也惟執事財教之幸甚

任將議

大抵倭之事一誤於輕戰再誤於矯封羣小  
之肉不足食已今無論其滅朝鮮不滅朝鮮  
寇吾地不寇吾地卽其殺我使人辱我行臣  
敢于不式則問罪之師必無再計所苦兵食  
寡已誠得強兵數萬號十萬十萬號數十萬  
如李衛公之討蓋蘇文飽其食驅之水陸並  
進以逐此奴猶以虎逐羊也若所謂奇才策

士者患不求求之患不用已豈患無人哉章  
不忘襲仇敢忘結士故自耳目所及而心所  
信者得數人焉有韜略可爲叅贊者幾有威  
智可爲偏裨者幾有力技可爲先鋒者幾有  
機辯可爲說間者幾卽所謂天下之將此中  
便有其人矣何者自古名將未有不自儒術  
著者太公黃石公無論已卽觀孫吳諸家所  
著爲書非一一得之詩書安能爲之後世若

漢衛青唐李勣之流雖不讀書其所以立威  
名亦其行事暗合古法然而不可以槩得也  
且求貴豪高亢之人則多持盈保終之念求  
之沈抑困厄之夫則有慷慨倜儻之烈故某  
之所舉不以彼易此也若所謂用兵之術戰  
守之要則訪其人可以各得其說行其說可  
以並收其效某未敢率爾爲之譚也伏乞上

裁

管制

論曰草昧之政多不及興陵夷之弊漸不可  
革行者無專制之權議者有生事之禁是故  
營代更而虛官時置而曠食歲供而滲兵日  
練而脆號令懸而不行器械具而難用嗟夫  
土木之役幾不能軍社稷之衛又何賴乎是  
故管制之事不可不講也

建官

論曰兵將相識文武相持建官之說固無遺哉魯三家晉六卿說者戒之夙沙衛殿齊師共事者羞之然則張孚敬之黜寺人趙貞營帥其得失可數矣

### 足兵

論曰議足兵者勾攝與召募而已然勾攝病擾狡者以懦弱應召募病疎貪者以雇倩充卽有精壯當隸籍者則又困於需索疲於奔



走非費數金歷數月不得走牒了諸衙門事  
古稱百金一士如此而士豈樂爲用哉則莫  
若預檄諸衛所報缺軍之數每月則總協大  
臣擇一大公所會巡視科道戶部驗糧兵部  
驗兵二主事令諸衛所官同召募僉曰某也  
武技某也驍勇則籍其年貌鈐以印付之本  
官而取其收管兵部則照冊發驗戶部則照  
冊起糧科道則照冊上號總協則照冊發管

咸以其日行之如此一日便得精兵若干循之數月不勾攝而兵足矣必曰孰爲餘丁孰爲戶識待保結而後收之幾不陷前輒哉

教閱

論曰大閱之禮三年一舉天子登將臺總協二臣親受事文臣元老而下武臣上公而下莫不率屬扈從大司馬申約束司徒頒犒養宗伯舉祀典大集車徒而簡之賞不遺隸圉

訓不廢勳崇自誓師而飲至皆有法周制大  
司馬中冬教大閱遂以狩王執路鼓下大綏  
載太常然而獨詳於三時者爲農隙故也兵  
農旣分則無日不可討其軍實而訓之然而  
閱以四中大閱以三年則其於兵力亦節矣  
節息有道伯者以興况堂堂六師乎

勤政勵學箴

有序巳丑試題代

夫精一之訓舜以命禹怠荒之戒益以儆舜

此豈聖哲之不足而過爲是鰓鰓哉蓋帝一  
與天地全心而與韋布異行是故政不廢宵  
旰之思學必懋始終之念者所以繼皇緒翊  
帝統登郅隆之理而熙懿鑠之號者也世主  
闇於大較而猥云清淨可以適治游泳非以  
養心是以胼胝非勵精之務而口耳爲離神  
之物也然則人君之一心何寓而彼三聖人  
之說又何以稱焉箴曰

惟乾資始惟坤資生其道惟何惟元之行於  
惟王心乾坤之輳匪政曷運匪學曷守守之  
運之其道惟何惟勤斯遠惟勵斯多惟多惟  
遠皇極斯建錫之萬邦胡不恒恒舜命精一  
益戒怠荒萬世永賴四夷來王惟此聖謨惟  
君之鏡惟我諸臣敢不以諍

賀李臨淮生日啓

伏惟我師帥宗依揄社麒麟承漢閣之圖祚

起茅封鷺鷥衍秦臺之瑞歷三朝而秉節總  
二府以宣猷日皎丹心趙將軍一身之膽風  
寒錢面賈都督千里之威入衛則星燦羽林  
七十二營之貔貅以奮出鎮則波澄淮甸一  
十四郡之鯨鱷以銷說禮敦詩門下有三千  
之客輕裘緩帶腹中多百萬之兵蓋明良合  
則天資帝師而文武兼則人推儒將所以昌  
風雲之會而篤河山之盟者也是月也金闕

吐氣搖佳色于鳳城玉塞橫蘆起雄聲于虎  
帳白招尊而兵象騰紫微朗而將垣高睢鵠  
舉之良辰實鷹揚於奕世營開細柳近分北  
極之光旂拂長楊遙動南山之氣方朔之桃  
似斗海上傳來安期之棗如瓜火中持出酒  
陳十日憑舞劍以稱觴曲度千秋襍饒歌而  
獻祝此人生之殷享而我侯之考脩也豈不  
以照冠紳而播金石哉某也才非國士分是

門生聞黃石之書蚤知異物睹白猿之術更  
識神人况鶴髮之未垂願爲肩以何聳據鞍  
方健誰誇賜杖之年橫梨長豪共愜懸弧之  
旦謹將三爵用報一壽幸隨轅下之駒而放  
籠中之鵠

荅蔡穆臺文學

獻賦其泉白鳳曾爲此去著書函谷青牛聊  
可騎來銀河瀛渤液之波再濯雲錦玉井脩



僊槎之棹一問天橋郢雪難和陽春古調新  
聲爭逐鹿清風不孤明月他鄉故國喜登龍  
漢室中郎君堪接踵韓公上第僕敢附臚德  
星聚灤海之光詞藻發溫陵之雅何勞追冀  
北霜蹄知擅平行空且好反圖南雲翼定驚  
于擊水邊城春色自生細柳之華岐路朝分  
共着飄蓬之影幽懷托綠綺非緣歌鳳臨邛  
壯氣起青萍蓋欲斷鰲員嶠不有作者其如

道何唱和旣全離索胡嘆唯玄侯七噓神遊  
陶阮之間媿黃童三謠風在李杜之下倘不  
廢縞帶紵衣之誼復當贈登山臨水之篇

謝惠詩啟

伏惟公相高卧林丘抱東山之雅望閑游翰  
墨播南國之清芬某不才幸桑梓之聯每瞻  
山斗媿雲泥之隔徒勞夢魂不謂大章忽及  
小子讀佳句則月露炫華瞻妙書則龍蛇闔

態懸之堂上蓬華爲之夜輝藏之櫝中金石  
同其日久珍逾雙璧寵比百朋敢不拜嘉何  
以報德

代人啟

伏惟台臺才重南金望高北斗願識荆者輕  
萬戶得御李者榮千秋某也私心竊嚮久矣  
所恨鴛鴦未流攀雲霄而自遠犬馬賤病過  
門墻以猶遙倘得借咳唾之餘津賜推挽之

微力是使蒲柳不苦于風霜之色而魚鳥早  
適其林泉之思也恩莫大焉于犯威嚴不勝  
惶悚

瘖者說

瘖者坐于道而求醫以手作狀過者弗之顧  
也疑其盲者也乃以數錢投之道上又有過  
者則拾而問之夫有錢則行者弗盲而瘖者  
不必能言錢乎錢乎其神醫乎

會館義塋募緣疏

苦海無邊福田有種亢草事怪已徵異世之人捐麥恩多況及他鄉之鬼吾邑之遊京師者有會館以寧來有義塋以卹徃生死之際可謂周矣然三寸之棺易朽一坏之土未封春雨秋霜處處有狐眠之跡晨風夜月時時有豕哭之魂此行路之所共傷而吾黨之所亟義者也謹告貴官長者與夫義士仁人願

發大悲各行廣施汎慈航於六道功德莫量  
緒善果於三生勛名不替

惠濟橋記

代

漢口一鄉在郡治北比閭之盛爲漢陽縣最  
而漢水上經郢鄧下達江淮又四方之所走  
集者其俗尚鬼有所禳則禱有詛說則禱禱  
必於普照寺而漢之一支西折之湖寺與鄉  
斷爲南北溽暑沍寒非橋苦不便寺之僧以

請於令令以請於余余稍出數石俸以先諸  
僚屬與諸鄉士大夫及諸鄉民諸行道之喜  
捨者爲之橋名以惠濟以乙未歲冬十一月  
始丁酉歲夏六月成旣成令復請記於余余  
曰是惡足記哉是惡足記哉昔者神聖人爲  
網罟爲耒耜與市爲舟楫車馬宮室杵臼書  
契諸事其利在天下萬世而天下萬世不言  
所利益忘之也今余爲跬步之橋與民無亦

欲使民忘之乎而記之是明余細也今日雖然釋氏以一剎一浮圖爲給孤長者無量功德長民者一念及民民被其施况爲之利與梁徒扛均爲民便漢之水其不爲溱與洧矣又何論鉅細且夫往來者時也成毀者物也舉廢者政也創繼者人也守漢以來未有及此者而創於今日又安知他日時更物變無有恢而繼之者乎不有所示繼者何徵且此



橋以此寺興此僧發念有給孤意亦不可沒  
是惡可不記哉惡可不記哉余感其言姑爲  
述之然而卒乎細矣

### 告魁星文

繫予初度日月會辰帝車西狩天節東巡頒  
武庫之儀仗錫秘府之文章戒后宮之傳保  
相下方之子孫于時命女道予於先搖光左  
轡開陽右輪驂玉虎駟金麋捐牛分之墊降

龍化之津臨水若雉越草如鷄名旣登於司  
祿道已應予進賢夫何附耳乍鑿卷舌忽逞  
牽予箕口置予斗間樞不爲轉柄不爲遷豈  
璇璣之未定抑權衡之弗均女其爲予問之  
司命狐心何赫竿目何昏雀頭何屈獺股何  
伸蛟何偃於角道犴何昂於井門龍何臥於  
房廐狗何吠於婁園三堦何擁六府何混七  
公何抗五侯何顛處士何遠從官何親須安

何賤御女何尊軒轅何聖社稷何神奚仲何  
主造父何臣國皇何客周伯何人蓬絮何德  
溫屋何功姜何屠肆之困孔何匏瓜之憐由  
何丈人之遇元何織女之詢屈何水府之危  
賈何長沙之恨黯何積薪之歎淹何貫索之  
冤傅何以尾化蕭何以昴生朔何以歲隱率  
何以庚仙女其爲予請之司命假予以天田  
使予多米穀徙予於天市使予多金銀避雲

雨之反覆起雷電之幽潛予將使伯樂選駿  
王良御軒擊天鼓張天弓出天街掃天津北  
河之槎槍無象東甌之峰燿無烟聆天樂之  
雅奏被一都之華衣聚會於五奎之井道遙  
於紫微之垣

烏啼怨

第一段

碧雲天迥今夜淒涼端的有四星寶篆銷香

鼎銀漏滴長更風兒清月兒明枕簟兒斗覺  
細寒生人不見獨自傷情復傷情芭蕉窗外  
不知何事有啼聲落葉空庭却是烏兒在那  
枝頭棲復驚凭畫闌倚雕屏立梧桐井繞槐  
亭悄悄冥冥聽烏啼好愁人愁人兮愁人愁  
殺箇深閨裏獨宿人盼歸程數歸程剔盡寒  
燈夢不成望玉京

第二段

山之曲水之湄蘭有葉菊有枝嗟我懷人朝  
朝暮暮一十有二時螢火度高閣蛩響入空  
帷砧聲急機聲遲笛聲兒何處更清凄這秋  
聲種種是相思相思相思復相思此時此夜  
那堪更聽啼鳥兒鳥兒鳥兒試教啼向那人  
兒異鄉孤館不信那人兒不悲春未來人先  
去秋已到人未歸啼鳥啼鳥正是斷腸時斷  
腸腸斷兮誰知魚鴈稀憑誰寄斷腸辭憶歸

數歸期樓頭更上幾層梯  
恠鳥啼恠鳥啼恠鳥啼  
不在東不在西偏在愁人耳畔  
恠教人恠不恠着伊

### 第三段

啼鳥啼鳥何怨何慕啼鳥啼鳥何哀何訴爲  
此聲嗚嗚旣不似晴日畫梁呢喃調燕子又  
不似那午陰綠樹睨睨轉鶯雛叫斷西風好  
似山中杜宇傷春的苦繞匝南枝真似峽裏

寒猿嘯月不勝的孤非絲非竹非歌歛不去  
伴懽娛偏來儂處贈欵歎怨女愁婦有能聽  
得此聲無

第四段

烏前暮呀呀昨宵啞啞最傷今夕還愁明夜  
明夜復明夜夜夜啼來令人夜夜愁難寫不  
知何時休罷若得休罷除是人兒蚤歸來也

第五段



啼鳥沒來由莫爲反哺憂莫爲無枝棲漢主  
莫爲有詔下江州啼不肖休啼不肖休莫爲  
蓬門子的弓來投啼鳥啼自寥寥有人愁黃  
華共瘦此情應不是傷秋聽啼鳥轉無聊

第六段

鳥兒鳥兒誰居誰處鳥兒鳥兒又飛又住鳥  
兒不如青鸞兒瑤池寄字不如白鴈兒玉塞  
傳書鳥兒不如海上燕兒乘雲軒嫁伴那王

子不如河邊鵲兒駕星橋渡那織女不如錦  
鴛兒有儔不如綵鳳兒有侶何爲長啼兮此  
樹啼將來都是惱人處

第七段

烏兒長夜啼嗚咽一更啼出那樓頭月兒缺  
二更啼起金風細細吹蘭闌三更啼下玉露  
滿羅襪四更啼得斗轉星明滅句句怨離聲  
聲傷別啼到五更時節十二闌干曲曲霜華

結烏兒烏兒假若是人兒這恨也應難說烏  
兒烏兒這淚兒縱一江春水流難歇

第八段

自是人情薄錯恨烏啼惡一聲啼來眉黛縮  
再聲啼來臉脂落三聲啼來渺沙漠漠一片  
離魂兒教人何處着

尾聲

念紅顏不堪摧挫歎青春容易蹉跎烏呵烏

何人不歸來啼奈何

顏回

天喪予的也顏回惜乎顏回不遷怒也顏回  
不貳過也顏回不遷和那不貳三月不違仁  
可謂好學也顏回賢哉顏回不幸短命死也  
顏回惜乎顏回顏回憶當初視予猶父也賢  
哉顏回今也無顏回惜乎顏回

又

天喪予的也顏回惜乎顏回一簞食也顏回  
一瓢飲也顏回一簞和那一瓢在那陋巷用  
則行舍則藏惟我與爾有是也賢哉顏回不  
幸短命死也顏回惜乎顏回顏回憶昔當初  
從我於陳蔡也賢哉顏回今也無顏回惜乎  
顏回

又

天喪予的也顏回惜乎顏回問爲仁也顏回

問爲邦也顏回問爲仁問爲邦語之不惰也  
無所不悅也終日不違於吾言也賢哉顏回  
不幸短命死也顏回惜乎顏回顏回憶昔當  
初畏於匡不敢死也賢哉顏回今也無顏回  
惜乎顏回

天文類

紫微垣

紫薇垣星十五位左八右七咸經緯左軀上

宰有少宰右樞少尉無上尉上弼少弼俱左  
環上輔少輔皆右綴四衛亭亭東西分二丞  
極耿耿北邊會北五星垣中依第一爲帝紐  
星歸二爲后三爲妃四爲太子明且赤五爲  
庶子向南輝六甲六勾陳一帶極東伸五帝  
五內座一簇勾東臥天皇大帝勾之中五帝  
內座勾中立柱史一女史一四箇御女座前  
出大理二陰德二五箇尚書門左侍華蓋光

團團杠柄影彎彎十二連珠插北關蓋上九  
傳舍舍西八穀架穀下六內階階前文昌排  
文昌六星如半月下連北斗七星發北斗之  
星七點昭四爲魁兮三爲杓第一主帝樞精  
正第二第三璇璣定四權五衡六開陽搖光  
居後垂垂映天地火水土木金正法令伐殺  
危應秦楚梁吳趙燕齊從一至七爲占證四  
輔垣中依北極三師垣外隨北斗天璇之下



太尊形天璣之外太陽守四勢近璣纏三公  
傍衡懸宰相上與天權接輔星右與開陽連  
玄戈一點搖光下遙望陽尊一路旋天牢六  
圓斗外帶天理四方斗內載內廚兩直少尉  
西天廚六橫少彌外天棊五曲廚下冲天槍  
三拱門前紅天床六聚依樞左天柱玉圍傍  
座東天乙太乙當門立天東太西同吉凶

太微垣

上元天庭太薇宮一道端門南面通一雙執  
法門左右二四將相垣西東垣中五帝座座  
後太子過幸臣一從官一太子東西立謁者  
一內屏四帝座前頭侍三公三九卿三五箇  
諸侯東西參惟有常陳當正北七星冉冉如  
舒翼左邊郎位十五攢右向台光三二灰少  
薇四長垣四相背却相似靈臺三明堂三和  
向不相參郎將常陳邊虎賁中台前二星耿

耿東西懸

天帝垣

一星何朗朗帝座垣中敞左爲侯位一星稀  
右爲宦者四星微五箇斗四箇斛斗垂斛仰  
座前蠱市樓六箇斛東南黑似玄珠圓似轂  
三宗正三宗人平列斗邊隣更有宗星亦二  
點直依吳越纏之濱車肆樓東起列四斗西  
止屠肆遙居九河底帛度平臨屠肆前各是

兩星分四裏團團九貫索垂垂三女牀牀前  
天紀闊索口九公長七公七天紀九九東七  
西天之後左先宋土連南海右起韓都帶楚  
梁南海通燕境東海接徐鄉吳越隨齊一路  
長中山西轉九河下趙魏相隣鎮左方巴蜀  
隨梁後秦周隔蜀傍鄭壤逶迤入晉陽河間  
東繞河中去自魏看來是右疆

角爲天關十二度黃道三門七曜路萬物始  
終以之生一人威信從茲布左爲理厥主刑  
右爲將厥主兵太陽經其南五星犯之旱難  
堪太陰經其北五星犯之水不測

兩爲角直懸着平道一雙橫貫却天田二角  
上起天門二角下止平星兩點門前倚十箇  
彎彎是庫樓五爲腹兮四爲頭樓內一衡獨  
四點衡邊五柱各三鈎周鼎三甲東叅南門

南樓前敞唯有進賢是一鳥却依手道右邊  
朗立春五更一度中清明三更中一度若求  
小滿正中時一更更七度君休悞

亢

四爲亢彎彎狀折威七箇橫其前大角一點  
懸其上左攝提右攝提三三鼎立角東西頓  
頑二陽門二兩兩連珠威下次折威之下斜  
相視雨水五更臨穀雨三更三度至

氏

氏亦四如側斗帝席三彎斗上居陣車三曲  
斗上走二十七點是騎官三二如鼎車前盤  
車騎三枝官下立將軍一位陣中看一天乳  
席東處二天輻陣東逐梗河席浚三橫流亢  
池斗右亦團浮更有招搖獨一點熒熒高照  
河上頭芒種一更二度取立夏三更入度求

房

房亦四向上彎下橫兩箇是從宮一鍵閉房  
上置二鈎鈐房東臨東咸西咸各四點蜀星  
三點咸中沉獨有房星一點白太陽之精簡  
裏尋夏至一更三度正立夏三更偏東寢

心

心是三向南出中央一點紅郁郁下頭四箇  
鼎形圍團圓十二爲續卒夏奎一更中偏東  
小滿二更二度逢起到滿朔夜裏看五更四



度正當中

觜

觜亦三作參盡九點座騎上直起司惟四星  
旗足西却與井邊鉞星倚立春一更四度中  
大雪三更中偏東有惟秋來霜降夜五更三  
度始當空

參

參是七南北分兩肩兩足三腰束伐亦三星

足裏存玉井四彎彎足西豎軍井四方方只  
南據南井之前二爲屏左足之下西爲厠厠  
前一點糞星黃與觜相依又同度

班鳩贊

於焉有鳥及時而鳴玉花檀粉文章英英女  
之文章蔽毛羽吾之精神敝典謨女之聰明  
知風雨吾之知識窮辰興女之不能爲巢庇  
妻子吾能爲國而致之唐虞吾與鳳凰爲侶

女與燕雀爲徒女胡爲揚揚乎翱翔於霄漢  
吾獨落落然浮沈於江湖故知明者愚之客  
巧者拙之奴

烏精石說

此石名烏精產於扶桑之下石胎之中其色  
蒼碧其狀如榴子其光見日而發向陰而藏  
蓋受太陽之氣包五行之象外暗而內明質  
小而光大隨方而可以觀五行之形按形而

可以占四時之候所謂有用之物鎮國之寶也

一東方甲乙木其正色青其間色五彩散出其狀如樹林卯時見

一南方丙丁火其正色紅其間色五彩最明其狀如佛燄巳時見

一西方庚辛金其正色白其間色五彩成條其狀如臥虹申時見

一北方壬癸水其正色黑其間色五彩近暗其狀如覆盂寅末卯初見

一中央戊己土其正色黃其間色五彩成點其狀如團錦卯初未末見

此論五形正色真形大畧如此其餘化形并助色則千態萬狀隨轉隨變不可勝言也

### 達摩贊

達摩達摩你好膽大只管放花惹生結果九

年面壁看得如何一輩渡江濟得甚麼賊形  
賊相偷盡彌陀我便是你你莫瞞我

魁星贊集毛詩

維北有斗爲章于天思皇多士于萬斯年

野雲贊

雲乎雲乎何氛氲耶飄飄江漢紫陽君耶

九子贊

東方之精蒼龍之形后妃之象子孫之靈神

宮內鎮傳母內屏愛保我嗣遐不干齡